

揭陽縣志

揭陽縣志卷之六

人物志

賢達

司馬遷云古者富貴而名磨滅不可勝數惟倜儻
非常之人稱焉世有身都通顯烜赫里閭迨世謝
時移過其廬者不能憶其姓氏有僅綰半通或潛
德弗曜而名迹所至每爭其生長地以爲榮故人
非無位之難無令名之難也揭夙負海濱鄒魯人
材輩出宋則陳思仲有廣南夫子之稱黃章卿騰
汀州生佛之譽其先河乎明嘉隆而後如中離之

理學襄敏之事功子修之忠鯁仲常之詞翰稱翹
楚矣外此分猷布化仁聞仁聲策功於仕籍者抑
不乏人焉志賢達

漢

吳碭字叔山建安中舉孝廉爲安成長孫權使呂岱取
長沙郡碭堅據不從權遣魯肅攻圍碭突去曰碭受
天子命爲長知有漢不知有吳也權後統有交廣碭
卒不仕祀鄉賢

唐

陳元光先世家潁川祖洪爲義安丞因留居爲揭陽人

父政以武功隸廣州揚威府元光習韜鈴善用兵累
官鷹揚衛將軍父死代爲將統兵鎮閩儀鳳二年崖
山劇賊陳謙攻陷岡州隨陷潮陽潮州刺史常懷德
檄元光討之元光入潮伐山開道大小百餘戰俘馘
萬計嶺表以次就平還軍於閩奏請置漳州謂周官
七閩宜增爲八詔從之卽命元光移鎮未幾閩寇大
熾戰沒於陣事聞贈右豹韜衛大將軍立廟漳浦開
元四年追贈潁川侯諡曰昭烈府祀繪壁

宋

陳希伋字思仲漁湖人元豐間兩冠鄉書肄業太學十

餘年聲譽日著士人目爲廣南夫子上書陳利害數萬言皆切中時病復薦太學生馬錫有文武才乞加擢用元祐六年舉經明行修時賜第者三百四十六人希伋爲第一知梅州時朝廷下諸州取黃砂牛皮及出內庫錢買珍珠以備國用諸州郡皆供應希伋獨不忍剝取於民乃上封事奏免州人德之卒於官所著揭陽集四百餘篇祀鄉賢

黃煥國字章卿在城人紹興二年壬子張九成榜進士宰臨汀政務綏和有戡亂功通判汀州秩滿民臥轍留之立祠於南安巖再遷鄞江三年卒中散大夫郭

正己贊之曰仁波德澤雨露均施忠肝義胆日月爭
輝譽著三陽功全五陟生佛見稱汀民廟食祀鄉賢
鄭國翰字寧夫藍田人紹興十八年戊辰王佐榜進士
與朱子同榜初授莆田令歷官兵部郎中見國事日
非致仕歸築莊於藍田之飛泉嶺集生徒講學其中
朱子遊揭陽常主於其家名益藉甚學者稱澹軒先
生

王中行隆興元年癸未未待問榜進士淳熙十二年授
東莞知縣慈祥愷悌博學能文以興學崇化爲首務
舊學湫隘弗稱輒遷之文風以振勸農桑均賦役恩

敷惠流有古循良風東莞祀名宦邑祀鄉賢有遷學
記載省志

明

全生在城人洪武二十六年癸酉歲貢授監察御史謫
按察司知事以父憂歸永樂改元起補岷府副審理
越三年賜歸又明年部符授宜山令縣有虎患爲文
告神逐之其害遂絕在任五年民頌其德以小罪謫
交趾歸卒

葉公養在城人永樂間由歲貢授刑部主事疏請卹刑
謫四川岳池令會定都燕京敕川省貢本郡縣騷然

會三司僉奏不免公養赴闕陳川民疾苦得溫旨越
年復職仍以主事攝縣事卒於官民哀之立祠祀焉
孫進舉人武定州同知曾孫應熊元孫厚皆歲貢

蔡顥字伯昂在城人景泰癸酉舉人授廣西太平府判
官監梧州鹽稅爲巡撫韓雍所器重遷象州牧歲歉
不及上聞發粟賑饑拂當道意致仕歸行李蕭然授
徒里中少卿吳裕郡丞張濬皆出其門邑宰陳爵遣
弟佐受業宏治間佐任本府推官簠簋不飭顥絕之
臨沒賦詩云平生耽讀數行書出守邊城在一隅律
已未嘗踰矩度持身恒欲絕塵汗傳家不患田園少

繼世惟憂孫子愚俯仰二儀難不愧永爲清苦老寒
儒識者謂爲實錄

徐虔字宗敬號肅軒官溪人天順丁丑進士授兵部主
事進香錫宴鈔俵馬不受常例還有鄉人歿京邸不
能歸者殯之又有收骸檢囊遺物付其家者人咸德
之考滿晉承德郎山東旱與僚長悉心區畫民賴以
活真定等郡水奉勅往勘量地蠲免民咸戴之升鎮
遠知府興學校勸農桑轉刀劍爲牛犢有龔渤海之
風四年謝病歸子衍孫日煥俱舉人

陳仕寶號介菴龍溪人天順壬午舉人癸未捷進士授

南京戶部主事轉郎中曹事肅清出知夔州府持已
廉潔爲民興利除害以勤慎著績陞陝西叅議晉右
叅政尋謝政歸卒年七十二弟仕輔郡諸生有才名
以恩授承事郎康熙辛酉舉人廷琦其後也

吳裕字敬昆霖田人訓導胄之子成化壬辰進士授戶
部主事改吏部文選司郎中能其職歷十八年擢右
通政以母老乞歸母卒終制改太僕寺少卿時雲中
用兵裕已嬰疾猶日治馬政卒於官訃聞朝廷遣官
諭祭曰惟爾早通經術起自遐方馳譽賢關奏名甲
第初官民部簡置銓曹進佐銀臺濬陞太僕聲稱益

著勞效良多委用方殷胡遽長逝追惟往勩宜卹
恩特勅有司爲營葬事遣官諭祭用慰爾靈九原有
知尚克承享祀鄉賢

林昕字宏耀號鈍齋漁湖人成化庚子解元初除昆陽
牧州人未知學昕首興學立師癸亥學災復增建之
巨寇楊萬鍾聞風向化率夥盜投戈願列爲編氓州
治東海口屢溢爲濬渠泄之溉田萬計尋擢廣信府
丞復州軍之誣役三十六戶民稱其惠冢宰聞名薦
擬僉憲以疾致仕歸卒海陽尚書盛端明爲之誌其
墓

許珊字仕選霖田人成化癸卯舉人少負異資勤於學
爲少卿吳裕所重授徒鄉里御史鄭一初出其門與
郡丞車份善未嘗干以私選授柳城令見明倫堂基
址湫隘拓之又建社學俾士子肄業邑有猺獞自宣
廟時已不輸國課珊至咸歸誠奉法令以疾致仕歸
祀名宦

王昂字抑之桃山人少負奇節事母孝居喪哀毀幾殆
成化甲辰進士授永豐令覈詭籍革巫俗擒宿盜辨
民冤新學宮復歐陽修墓購求羅倫一峯集梓之嘗
禱雨命童子號曰令有罪民何辜天終不雨令可屠

歌罷雨至又時大疫延數千家昂躬與祈禳病者皆起以治行高等擢太僕寺丞察馬政利病條成一疏四千餘言會遘病卒所遺僅詩文數卷及宋史補數冊祀鄉賢祀江西永豐名宦見一統志

莊典字惇之龍溪人宏治丙辰進士授安福令性峻潔不阿每事必札記而行一稟於法或以召謗難之曰三尺法如是吾知奉法而已延接士大夫雍雍如也無敢干以私創學舍五十餘楹以居生徒朔望與爲講論不倦考最疏乞改教調國子博士尋擢德府長史丁內艱起補淮府時宸濠蓄異志挾借支祿米典

持不與濠怒召往見典植立庭下詞色俱厲杖之隨
下獄不食三日衣冠范坐而歿御史王完疏其忠嘉
靖改元贈太常少卿遣官諭祭曰惟爾賦性聰明持
身端謹早膺簡拔輔導宗藩耻附逆濠毅然守正橫
遭囚辱箠責而亡新政之初忠賢在念特頒卹典贈
祭爾靈冥漠有知尚克歆慰淮王遣使祭曰莫非人
臣爾獨賢勸人孰不死爾獨就義雖死猶生乾坤正
氣爾應含笑爾曷有愧一鑑云亡我曷不淚薄奠是

將昭格不昧祀鄉賢

祀安福縣名宦見吏部
尚書唐龍循吏錄序

楊璵字景瑞龍溪人與弟瑋俱師事陳獻章正德戊辰

進士授監察御史彈劾不避權要奏徙牧馬草場以
防火患按江南全活憲獄百餘人以養病歸居家宗
有訓族有規鄉有約化行於鄉潮久苦隄潰璵聞奏
勅有司堅築爲民永賴與王守仁友善嘗爲庭訓錄
守仁序之曰古人所有教其子者不外於身心性情
之德人倫日用之常後世文詞以爲功機械以爲智
巧利以爲能浮夸以爲美父以是爲能訓子以是爲
善承蓋與古人之教相背而馳矣亦何怪於人心之
日壞而風俗之日媮乎吾友侍御楊君景瑞獨能以
是訓其子其亦庶幾乎古人之意矣爲楊氏之子若

孫者果能沿是而進勉勉不已雖爲聖賢可也君之
子思元從予遊暇中持斯冊來視因爲識數語歸之
卒祀鄉賢海揭各有專祠

楊瑋字約齋龍溪人侍御瑱同懷弟也性穎異勵志力
學從遊者多有成就登宏治壬戌進士試南京戶部
主事奉命按江南糧儲廉能公正吏民畏服有贛令
以黃金置盎中託言蜜煎以獻發之乃金也立却之
歷本部郎中在部八年出知辰州尋擢貴州按察副
使念母老欲乞終養會邊鄙多故戎務方殷不果日
繕阨塞釐軍籍撫戢殘黎境內大治未幾丁母艱抵

家過於哀毀十餘日卒士論惜之

鄭一初字朝朔官溪人少讀書紫服山因號紫坡和易
謹介不立崖畛無疎戚遠邇咸敬愛之宏治乙丑進
士越年正德改元劉瑾用事不謁選家居以耕讀教
子弟於世味澹如也有鄉人緣事在囿以百金求爲
居間曰名義至重鬼神難欺敢饒舌作說客耶却之
劉瑾旣敗赴都授試御史巡按雲南風紀肅然在京
師從王守仁講學日與橫山箬溪諸賢相質問得聖
賢之旨以疾乞休途次杭州卒祀鄉賢子大崙舉人
另有傳